

Nagut cun damain taglia per ustiers – la discussiun cuntinua

■ **(anr/vi) Ils votants svizzers na concedan als ustiers betg la medema taglia sco als take-aways. Ma las dispittas van vinavant. Tant vuschs da la pld sco da la pbd pretendan las medemas tariffs per tuts.** Ina refusa uschè datscherta è ina surpraisa per ils ustiers. L'uniun Gastrosuisse aveva plitost quintà cun in resultat satigl, ma betg cun refusas d'enturn 70 pertschient. Tuttina chatta il president dals ustiers *Casimir Platzer* anc intgins plets positivs tar l'esit da la votaziun. «Nus avain pudì mussar al pievel la muntada da la gastronomia.» Avant l'iniziativa na savevia la populaziun gnanca che las ustrias pajan dapli taglia sin plivalur che las stizuns da victualias u ils take-aways.

L'iniziativa haja fatg naufragi perquai ch'ins temiva pli autas taglias en cas d'in gea, analyseschan ils iniziants.

La medema tariffa per tuts

La tematica resta dentant sin il parchet politic. La pbd fa da savair ch'ins sustegna ina tariffa unitara da taglia sin plivalur. «Nus vegnin ad inoltrar in'intervenziun en la sessiun d'enviern», sa lascha *Nina Zosso* citar.

Era cusseglier naziunal *Ruedi Noser* (pld/ZH) dat en la medema crenna. El giavischa ina discussiun davart ina tariffa unitara per tuttas branschas. «Quai fiss ina soluziun gista.»

La pld pretendia gia daditg in sistem pli simpel e taglias pli bassas per tuts. L'iniziativa da Gastrosuisse n'accumpliva betg questa pretensiun, di Noser. I gievia là be per ils interess particulars dals ustiers. Lezs na sajan dentant betg

ils sulets ch'endirian pervi da taglias autas.

Noser pleda per ina tariffa unitara cun excepziuns. «Vivondas sco paun e latg stuessan esser libras da taglias.» La glieud giavischia ch'ins differenzieschia tranter products da luxus e mangiativas dal mintgadi.